

Naalackersuisut Aatsitassanut inatsimmut UPA 14-imut allannguutissatut siunnersuummik saqqummiussinissamut pisussaaffilerneqarnissaat pillugu Inatsisartut aalajangiussassaattut siunnersuut, taamaalilluni uran aamma thorium atominit qaartartuliornermi atortussiassatut nassuiarneqartussanngorlugit aamma suliareqqitaanatik saffiugassatut (ore) pissuseqartillugit, taamaalilluni inatsimmi atortussiassat radiop qinngornerinik navianartunik akullit atortussiassallu allat ersarissumik immikkoortinneqaleqqullugit, avatangiisinut tunngasutigut piumasaqaatit eqqarsaatigalugit tamatumani aamma ilanngullugit piiaanermi sinnikorineqartut (tailings) aammalu piiaaffiusimasup matuneqarnerani igitassat.
(Inuit Ataqatigiit Inatsisartuni ilaasortaataat)

Akissutitut allakkiaq

(Inuussutissarsiornermut Aatsitassaqaarnermullu Naalackersuisoq)

Aappassaanneerera

Inatsisartut aalajangiussinissaannut siunnersuutip siullermeernerata nalaani uranip thoriumillu inatsisilersuiffigineranut iluseq pitsaanerpaaq aatsitassanut inatsisip sinaakutissarisata iluaniinnera amerlanerussutigineqarpoq.

Immikkut ittunik malittarisassianik ”qaartartuliornermi atortussiassat” pillugit aalajangersaanerit Namminersornermut inatsimmi aamma aatsitassanut inatsimmi malittarisassianut oqaatsinillu atuinernut naapertuutissanngillat, tassaniimmata ”atortussiassat” pinnagit ”aatsitassat” aamma ”mineralit” pillugit malittarisassiat.

Taamaattumik aatsitassanut inatsisip oqaatsinik nassuiaatinillu atuinera allanngortinnagu ingerlateqqiinnarnissaa pitsaanerusoq siunnersuutip siullermeernerani Naalackersuisut tikkuarpaat. Urani mineralillu radioaktiviusut allat aatsitassani inatsimmi ”qaartartuliornermi atortussiassatut” immikkoortinneqassappata suliaasaqarfimmi inatsisiliornermik piginnaasaqartuuneranik – Kalaallit Nunaata imaluunniit Danmarkip – paatsuugaqarnermik nassataqarsinnaavoq.

Taamaattumik siunnersuutip siullermeernerani tunngavigisat taakku Naalackersuisut attataralugit siunnersuut itigarteqqaat.